



Brev dato: 15-11-2024
Sagsnr. 2024 - 20318
Akt. nr. 24702049

Postboks 1614
3900 Nuuk
Tlf. (+299) 34 50 00
E-mail: nap@nanoq.gl
www.naalakkersuisut.gl

Inatsisartuni ilaasortaq
Pele Broberg, Naleraq
/Maani

Asasara Pele Broberg

Kalaallit inuiaat aamma nunap inoqqaavi pillugit Naalakkersuisunut 2024-mi oktobarip 11-ani apeqquteqaateqarputit. Apeqquteqaallu uannut akisassanngortinneqarpoq.

1. Naalakkersuisut paasinnittariaasiat naapertorlugu, "Inuiaat Kalaallit", nunap inuiisa "Kalaallit Nunaanni nunap inoqqaavisa" kinguaavinit, allaanerussuteqarpat? Tassannga assigiinngissuteqarnerisut, Naalakkersuisut piviusuusumik toqqaannartumillu aallaavilimmik, oqaatsit pisariaqanngitsut allamullu saasaarisut atornagit, uani akissuteqaqquneqarput.

Akissut:

Kalaallit qallunaallu isumalioqatigiissitaasa Kalaallit Nunaanni namminersormernik isumaliutissiissutaanni immikkoortoq 2.3.1-mi "inuiaat kalaallit" Kalaallit Nunaanni nunap inoqqaavinit aallaaveqartutut oqaatigineqartoq Naalakkersuisut isumaqatigaat imaattoq:

"2.3.1. Inuiaat inatsisaat malillugit inuiaaneq

Namminersorneq pillugu kalaallit isumalioqatigiissitaasa isumaliutissiissutaata 2003-meersup [takusassaq 13] inerneraa inuiaat kalaallit inuiaat inatsisaat malillugit inuiaasut imminnut aalajangersaaffigisinnaassusillit. Aamma taama inerniliivoq Gudmundur Alfredsson atuakkiamini uani "The Right To National Self-Determination" [takusassaq 14].

Aammattaaq Nunanut allanut ministereqarfiup apeqqut sammivaa allakkiamini 8. november 2004-meersumi, apeqqutigineqarmat inuiaat kalaallit inuiaanersut inuiaat inatsisaat malillugit [takusassaq 15]. Nunanut allanut ministereqarfiup allaaseraa inuiaat inatsisaat aallaavigalugit "inuiaat" qanoq paasisariaqarnerat erseqqivinngikkaluartoq taamaattoq tunngaviusumik paasinnittoqarsinnaasoq killiliniarnermi iluaqutaasinnaasunik.

Inuiaat paasineqarsinnaapput tassaasut inuit immikkoortut tunngaviit aalajangersimasut ataasiakkaanullu tunngasut tunngavigalugit aalajangersimasunik ilisarnaqatigeequteqartut, inuiannit allanit erseqqissumik allaassutigisaminnik. Ilisarnaatit aalajangersimasut taaneqarsinnaapput ataatsimoorlutik oqaasii, ingerlaasiat, kikkussusiat, kulturiat upperisaallu. Aammattaaq tassaassapput inuiaat nunami aalajangersimasumik killilimmi inuusut. Ataasiakkaanullu tunngasunik ilisarnaataattut taaneqarsinnaapput inuit akunnerminni pissutsitigut ataatsimooqatigiinnerat, atukkamikkut assigiinnginnerat kiisalu kinaassutsiminnik ataatsimoorlutik paasinninnerat.

Nunanut allanut ministereqarfik inerniliivoq ministereqarfiup paasinninnera malillugu inuiaat kalaallit naammattunik immikkooruteqartut inuiaat inatsisaannik

paasinnittarneq malillugu inuiattut taaneqarsinnaasut. Tamanna isumalioqatigiisitanit tusaatissatut tiguneqarpoq inerniliinerlu suliامي tunngavigineqarluni.”

Ilanngullugu § 37-apeqqummut nr. 179-imut Jens Napátok’-p Naleraq-meersup siusinnerusukkut apeqqutigisimasaanut akissutigiga innersuussutigaaara.

Takusassaq 13: Kalaallit namminersorneq pillugu isumalioqatigiissitaata isumaliutissiissutaa, marsi 2003.

Takusassaq 14: The Right To National Self-Determination – The Faroe Islands and Greenland, Martinus Nijhoff Publishers, 2004, qup. 49 tulliilu.

Takusassaq 15: Tak. Ilanngussaq 7.

Inussiarnermik inuulluaqqusillunga



Vivian Motzfeldt
Naalagaaffinngornissamut Nunanullu allanut Naalakkersuisoq